



Regulamento 08/2025 de 28 de maio, de Consello de Goberno, polo que establecen os criterios para a selección de áreas de coñecemento de cara á convocatoria de prazas de axudante doutor/a co fin de estabilizar o emprego temporal

Artigo 1. Finalidade

Para consolidar o emprego temporal e reducir o número de profesorado contratado interino de substitución (CIS), que non fose previamente axudante doutor/a, e de profesorado asociado que poida cubrir necesidades docentes estruturais mediante concurso en profesorado axudante doutor/a, e de favorecer a paulatina renovación do profesorado universitario establécense os criterios relacionados a seguir.

Artigo 2. Candidaturas

As candidaturas propostas serán de profesores/as contratados/as Interinos/as de substitución (CIS) ou de asociados/as co título de doutor/a.

Artigo 3. Requisitos das solicitudes

Só se atenderán as solicitudes en que, de acordo co PDA aprobado para o curso académico 2025/26, as necesidades docentes das áreas de coñecemento para as que se presenten candidaturas superen a capacidade docente.

Non contabilizará neste cómputo o profesorado subrogado desde o 01/08/2020 como consecuencia da integración do grao en Turismo, que poderá optar a este programa co cómputo específico ás súas necesidades docentes e capacidade.

Artigo 4. Cómputo das necesidades docentes

Para estes efectos, enténdese por necesidades docentes as horas correspondentes ás aulas presenciais e á dirección de TFG/TFM do encargo docente á área de coñecemento no PDA aprobado para o curso académico 2025/2026, excluindo o encargo docente do grao en Turismo que só computará nas solicitudes presentadas para o seu profesorado.

Artigo 5. Cómputo da capacidade docente

1. Para estes efectos, enténdese por **capacidade docente** a suma da dedicación académica do profesorado permanente da área de coñecemento –incluído o PDI con reserva de posto de traballo–, do profesorado con compromiso de estabilización e das prazas creadas no marco de programas específicos de captación de talento (Ramón y Cajal, Beatriz Galindo, InTalent, Consolidación investigadora etc.) que contén con compromiso de estabilización. En todos os casos a capacidade docente computará como 240 horas.

2. Desta capacidade docente deduciranse 240 horas por cada profesor/a permanente da área de coñecemento cuxa xubilación forzosa estea prevista antes de 1/9/2028.



3. A capacidade docente das prazas creadas no marco de programas específicos de captación de talento (Ramón y Cajal, Beatriz Galindo, InTalent, Consolidación investigadora etc.) que contén con compromiso de estabilización non computará no caso de que existan na área prazas de profesor/a contratado/a interino/a de substitución anteriores á incorporación deste persoal investigador que non tivesen a oportunidade de acceder á convocatoria dunha axudantía.

Artigo 6. Convocatorias por área de coñecemento

Convocarase unha única praza de axudante doutor/a por área de coñecemento, agás nos casos seguintes, en que poderá convocarse unha segunda praza:

- a) Cando as necesidades docentes continúen a superar a capacidade, unha vez computadas as 240 horas dun eventual novo compromiso de estabilización. As candidaturas da mesma área priorizaranse segundo o nivel de acreditación, a data do certificado de acreditación e, caso de existir empate, pola antigüidade na UDC.
- b) Cando a solicitude inclúa profesorado subrogado como consecuencia da integración do Grao en Turismo, que poderá optar a este programa co cómputo específico das súas necesidades docentes e da súa capacidade docente.

Artigo 7. Prelación das solicitudes

1. No caso de que o número de solicitudes sexa superior ao de prazas ofertadas, a prelación entre as áreas que presenten candidaturas organizarase da seguinte maneira:

- a) No 50% das prazas só se considerarán as solicitudes que presenten candidaturas coa acreditación a axudante doutor/a. Dentro delas, terán prioridade as candidaturas que presenten a acreditación a profesor/a titular de universidade ou a profesor/a contratado/a doutor/a.
- b) No restante 50% de prazas, a prelación establecerase segundo a maior diferenza entre necesidades docentes e capacidade docente tal e como foi definida nos puntos 3, 4 e 5.

2. Se o número de solicitudes fose menor ao de prazas en calquera das reservas anteriores, as prazas restantes sumaranse ás da outra reserva.

Artigo 8. Reserva para persoas con discapacidade

De ser o caso, nas convocatorias realizarase a correspondente reserva de prazas para persoas con discapacidade.

Artigo 9. Compromiso das áreas de coñecemento

Estas transformacións supoñen o compromiso das áreas de asumir no curso académico 2025/2026 a totalidade do encargo docente asociado ás candidaturas propostas e en ningún caso poderán utilizarse para solicitar a contratación de novo



profesorado.

Disposición adicional

O número de prazas de axudante doutor/a será aprobado pola COAP a proposta da vicerreitoría de Profesorado.

A vicerreitoría de Profesorado realizará a convocatoria para a selección das áreas, que estará dirixida aos departamentos. Con esta finalidade, requirira a información que precise dos servizos da UDC e das persoas e dos departamentos afectados.

Unha vez recibidas as solicitudes, a vicerreitoría de Profesorado realizará a prelación das solicitudes recibidas e comunicará o resultado aos departamentos, á representación dos/as traballadores/as e ao Consello de Goberno.